

Sarkina Bt Mat Saad @ Shaari

From: UUM CORPORATE COMM.
Sent: Tuesday, May 14, 2019 9:24 AM
To: UUM - All Staff; UUM - All Students
Subject: Konvoi Santuni Masyarakat Koh Yao, Thailand



UUM Corporate Comm.
Universiti Utara Malaysia

14 MEI 2019 / 09 RAMADAN 1440H

"UUM : UNIVERSITI PENGURUSAN TERKEMUKA"
(THE EMINENT MANAGEMENT UNIVERSITY)

Oleh: Siti Fatimah Abdullah

KONVOI SANTUNI MASYARAKAT KOH YAO, THAILAND



UUM ONLINE: Program Kembara Ukhuwwah Dakwah Motosikal Berkuasa Rendah Ke Kampung Koh Yao Pulau Panjang, Satun, Thailand menyantuni masyarakat Islam yang memerlukan.

Ustaz Yusnaidi berkata, Pusat Islam UUM dengan kerjasama Jabatan Pendidikan Negeri Kedah dan Kelab Kenu UUM menganjurkan kembara dengan motosikal yang julung kali diadakan di kalangan staf UUM.

"Dakwah merupakan tugas mulia yang dilaksanakan dengan berkesan sepertimana yang dilakukan oleh Nabi Muhammad SAW.

"Kita mahu lahirkan staf UUM yang memahami konsep dakwah dan seni dakwah yang berkesan di samping menjalin ukhuwwah dan kerjasama masyarakat antarabangsa," katanya.

Jelasnya, program ini bertujuan menarik minat staf untuk melibatkan diri dalam dakwah secara santai serta mewujudkan semangat ukhuwwah dan kerjasama yang mantap di kalangan peserta.

“Menariknya kembara kali ini, bukan sahaja melawat tempat peranginan dan percutian tetapi kami mengunjungi kampung yang dihuni oleh masyarakat Melayu Islam Satun di Pulau Panjang,” tambahnya.

Pemilihan kampung ini berdasarkan cadangan daripada pihak Konsulat Malaysia di Songkhla memandangkan kebanyakan penduduk yang tinggal di sini merupakan nelayan yang majoritinya Islam yang sangat miskin.

Masyarakat Islam di Satun mempunyai nilai yang sama dengan budaya orang Melayu di Malaysia misalnya meraikan tetamu, mudah mesra selain masjid ada di merata tempat yang menjadi simbol penyatuan umat Islam berpaksikan aqidah tauhid.

Suasana kampung dan budaya tolong menolong masih menebal di kalangan penduduk yang hidup sederhana namun bersyukur dengan apa yang ada.

Beliau menyifatkan peserta sebagai duta kecil Malaysia dalam merapatkan hubungan dua negara yang berjiran melalui riadah yang menjadikan mereka lebih dekat sekali gus mencapai imej UUM yang prihatin terhadap komuniti.

“Kita membawa nama UUM dan memupuk semangat tolong-menolong dengan mengadakan kenduri memasak bersama penduduk,” katanya.

Ketua Konvoi, Kassim Ibrahim berkata, Konvoi bermotor dapat mendekati budaya hidup masyarakat Islam sekali gus melahirkan semangat kesukarelawan dan memperkenalkan UUM kepada masyarakat antarabangsa.

Menurutnya, misi kemanusiaan ini membabitkan jarak keseluruhan 500 kilometer bermula dari Welcome Centre UUM melalui Pintu Sempadan Wang Kelian sejauh 75 kilometer.

Konvoi ke Wang Sai Tong pula sejauh 72 kilometer sambil menikmati keindahan sungai serta air terjun yang memukau dalam aktiviti latihan berpasukan dengan menaiki kayak.

Seterusnya bergerak ke Satun yang memakan jarak 70 kilometer sebelum singgah di Masjid Mambang. Keesokan hari perjalanan kembara bermula seawal jam 8.00 pagi ke Tamalang Port dengan menaiki bot ke Pulau Panjang.

Sementara itu, Mohamad Nizwan Awang berkata, konvoi ini menjadi acara istimewa sambil menyaksikan keindahan alam merentasi kawasan pantai yang memutih, bukit bukau dan hutan menghijau.

“Puas dapat berkonvoi dalam perjalanan yang jauh, yang memupuk semangat berpasukan bersama-sama menjaga keselamatan ketika menunggang motosikal dalam perjalanan jauh.

“Memang seronok naik motor beramai-ramai sambil melihat tempat orang yang berbeza adat dan budaya malah kembara ini dapat merapatkan silaturahim sesama staf yang sebelum ini sekadar berjumpa dalam UUM tapi tidak pernah bersembang begitu juga rakan-rakan yang dari luar,” ujarnya.

Satu-satunya peserta wanita, Dr Khairina Rosli menimba pengalaman yang cukup bermakna.

“Dakwah secara santai menjadi medan terbaik untuk mengeratkan hubungan kawan-kawan, ayah dengan anak, suami dan isteri paling penting doa & tawakal pada Allah sepanjang masa lebih-lebih lagi ketika musafir doa mudah dimakbulkan.

“Saya teruja dapat melihat Islam di tempat lain, banyak masjid di sepanjang jalan dan insaf tengok semangat orang-orang tua dan mereka yang lagi susah tapi tetap bekerja keras menyara kehidupan.

“Paling menyedihkan, penduduk hidup dalam serba kekurangan dan tiada punca air sehingga terpaksa menggunakan air tadahan hujan untuk mandi, dengan keadaan air bersih kurang, mereka terpaksa jimatkan air dan buat filter menggunakan pasir dan batu.

“Jadi, peserta banyak belajar daripada kembara ini, muhasabah diri dan bersyukur di bumi Malaysia yang dilimpahi nikmat dan serba-serbi ada,” katanya.

Selain itu, beliau kagum dengan Pengurusan dan pasukan konvoi yang menyemai rasa tanggungjawab, semangat setia kawan dan tolong-menolong.



 Please consider the environment before printing this e-mail



Universiti Utara Malaysia Official Website <http://www.uum.edu.my>

Disclaimer: This e-mail (including any attachments) may contain confidential information. If you are not the intended recipient, you are hereby notified that any review, distribution, printing, copying or use of this e-mail is strictly prohibited. If you have received this e-mail in error, please notify the sender or Universiti Utara Malaysia (UUM) immediately and delete the original message. Opinions, conclusions and other information in this e-mail that do not relate to the official business of UUM and/or its group of companies shall be understood as neither given nor endorsed by UUM and UUM accepts no responsibility for the same. All liability arising from or in connection with computer viruses and/or corrupted e-mails is excluded to the fullest extent permitted by law.